

Na osnovu člana 8. stav 3. alineja 1. Zakona o principima lokalne samouprave („Službene novine Federacije Bosne i Hercegovine“, broj 49/06. i 51/09.), člana 14. stav 2. alineja 1. Statuta Grada Tuzle („Službeni glasnik Grada Tuzle“, broj 6/21) i člana 94. Poslovnika Gradskog vijeća Tuzla („Službeni glasnik Grada Tuzle“, broj 5/22 i 14/24), Gradsko vijeće Tuzla, uvažavajući historijsku ulogu Tuzle kao simbola mira, tolerancije i multietničkog života, na sjednici od 27. marta 2025. godine, donosi

## **REZOLUCIJU o očuvanju mira i sprječavanju sukoba**

### **I**

#### **MIR JE KLJUČNA VRIJEDNOST KOJU MORAMO ŠTITI**

Gradsko vijeće Tuzla svim građanima Bosne i Hercegovine poručuje: mir je temeljna vrijednost društva i njegova zaštita mora biti apsolutni prioritet. Svaki sukob, bilo kojeg oblika, donosi samo razaranje, stradanje civila, gubitak osnovnih prava i dugoročne posljedice koje pogađaju svakog građanina. Rat nije igra niti pitanje pobjede ili poraza - rat je uvijek poraz za sve.

Bosna i Hercegovina se u prošlosti suočila s najtežim oblicima sukoba i razaranja, zbog čega danas postoji moralna i politička odgovornost da se ne dopusti ni najmanja destabilizacija i ugrožavanje mira.

### **II**

#### **ODGOVORNOST SVIH POLITIČKIH AKTERA ZA OČUVANJE MIRA**

Gradsko vijeće Tuzla apeluje na sve političke i društvene aktere da se uzdrže od retorike, poteza i odluka koje mogu voditi ka radikalizaciji i podizanju tenzija. Svako neodgovorno djelovanje može imati nesagledive posljedice i proizvesti atmosferu nesigurnosti, što nikome ne donosi korist.

Pozivamo nadležne institucije da postupaju isključivo u skladu s pravnim poretkom, s ciljem zaštite mira, sigurnosti građana i stabilnosti društva.

### **III**

#### **PRIORITETNO DJELOVANJE U SLUČAJU BILO KAKVOG POKUŠAJA SUKOB**

Gradsko vijeće Tuzla naglašava da je u slučaju bilo kakvog pokušaja izazivanja sukoba, bilo od strane pojedinca, organizovane grupe ili institucije, neophodno prioritetno djelovati kako bi se spriječila eskalacija i zaštitili građani.

Nijedna politička ili ideološka nesuglasica ne može biti razlog za nasilje i destabilizaciju. Svaka odgovorna institucija, organizacija i pojedinac moraju biti svjesni svoje uloge u očuvanju mira i dužni su da preduzmu mjere protiv svih koji ugrožavaju sigurnost i stabilnost društva.

### **IV**

#### **TUZLA SE OBRAĆA DOMAĆIM I MEĐUNARODNIM INSTITUCIJAMA ZA OČUVANJE MIRA**

Tuzla ne može i neće biti usamljeni glas razuma, jer stabilnost Bosne i Hercegovine nije samo unutrašnje pitanje - to je pitanje međunarodne sigurnosti.

Ovim putem se obraćamo:

- međunarodnim zvaničnicima, uključujući vlade Sjedinjenih Američkih Država, Ujedinjenog Kraljevstva, država Evropske unije i svih drugih država koje podržavaju mir i stabilnost u Bosni i Hercegovini;

- međunarodnim institucijama prisutnim u Bosni i Hercegovini, uključujući Ured visokog predstavnika (OHR), Evropsku uniju (EU), Organizaciju za sigurnost i saradnju u Evropi (OSCE), NATO i EUFOR;
- diplomatskim predstavništvima u Bosni i Hercegovini, ambasadama i konzularnim predstavništvima država članica Ujedinjenih nacija i drugih relevantnih međunarodnih organizacija;
- institucijama Bosne i Hercegovine, Federacije Bosne i Hercegovine i Republike Srpske, s jasnim apelom da postupaju odgovorno i da kroz institucionalni dijalog rješavaju sva otvorena pitanja;
- građanima Bosne i Hercegovine, uz poziv da ne nasjedaju na provokacije i da razumom, solidarnošću i odgovornim djelovanjem doprinesu očuvanju mira.

## V

### GLAS RAZUMA ZA CIJELU BOSNU I HERCEGOVINU


Tuzla nije i ne može biti izolovan slučaj - ovo nije samo stav jednog grada, već poruka u ime svih građana Bosne i Hercegovine koji žele sigurnost, stabilnost, MIR i dostojanstven život.

Tuzla ostaje dosljedna principima mira, pravne sigurnosti i razumnog političkog djelovanja. U trenutnim izazovima, odgovornost, mudrost, razumne i hladne glave su ključni faktori koji će odrediti budućnost države i svih njenih građana.


## VI

Rezolucija će se objaviti u "Službenom glasniku Grada Tuzle", na internet stranici Grada i u sredstvima javnog informisanja.

**GRAD TUZLA**  
**GRADSKO VIJEĆE**  
**Broj: 01/04-A-5076-2025**  
**Tuzla, 27.mart 2025. godine**



**PREDSJEDAVAJUĆA**

  
\_\_\_\_\_  
**Ana Pejić, BA prava**